

DOMINGU XXIX TEMPU KOMÚN – TINAN A

Tema

Liturjia Domingu XXIX Tempu Komún nian konvida ita atu reflète kona-ba forma oinsá ita tenke tetu relasaun entre realidade sira Maromak nian no realidade sira mundu nian. Nia hateten katak Maromak mak ita-nia prioridade no katak ba Nia mak ita tenke subordina ita-nia ezisténsia tomak; maibé nia aviza mós ita katak Maromak bolu ita ba kompromisu efektivu ida ho mundu nia konstrusaun.

Evanjellu hanorin katak ema, hodi la husik atu kumpre ninia obrigasaun sira ho comunidade nia integra an bá, ba Maromak de'it mak nia pertense no tenke entrega ninia ezisténsia iha Maromak nia liman. Buat seluk hotu tenke relativiza, inklui submisaun ba podér polítiku.

Leitura dahuluk dehan mai ita katak Maromak mak istória nia Na'in loos nian no Nia mak gia Povu iha nia dalan ba ksolok no realizasaun nakonu. Ema sira ne'ebé atua no intervein iha istória mak instrumentu de'it ne'ebé Maromak uza atu konkretiza Ninia projetu sira salvasaun nian.

Leitura daruak apresenta mai ita ezemplu comunidade sarani ida ne'ebé tau Maromak iha sentru nia dalan nian, no maski hasoru difikuldade sira, nia kompromete an ho barani ho valór sira no eskema sira Maromak nian. Maromak mak hili nia atu sai sasin iha mundu, moris fiar ativa, ho karidade badinas no iha esperansa ne'ebé la nakdoko.

LEITURA I – Is 45,1.4-6

Ita-nia testu pertense ba “Livru Konsolasaun” Deutero-Isaías nian (kf. Is 40-55). “Deutero-Isaías” mak naran konvensionál ne'ebé biblista sira fó ba profeta anónimu eskola Isaías nian, ne'ebé kumpre nia misaun profétika iha Babilónia, entre judeu sira iha ezíliu. Ita iha finál Éziliu nian, entre 550 no 539 mK.

Durante Nabónides nia ukun, liurai Babilónia nian, mosu iha Pérsia fitun foun iha polítika internasionál... Iha 553 mK, Ciro, liurai Pérsia nian, konkista kapitál Média (Ecbátana) nian no tau hamutuk impériu Medo no Persa nian. Hafoin (547 mK), marxa kontra Lídia, konkista Sardes foti parte boot Ásia Menór nian. Tinan sira tuir mai, ho vitória lubuk ida fó ba nia ukun iha Irão orientál, Afeganistão no Turquestão, to'o Índia. Ho kbiit osan-mean no ho funu-na'in sira nian, tuirmai, nia dirije ninia tropa sira kontra Babilónia no, iha 539 mK, nia tama iha kapitál Babilónia nian ho vitória, no laho opozisaun, simu nia nu'udar libertadór.

Atividade profétika Deutero-Isaías dezenvolve iha tinan sira molok Ciro nia entrada ho vitória iha Babilónia... Notísia sira kona-ba Ciro nia vitória halo eziladu sira mehi kona-ba proximidade libertasaun nian husi dadur. Hamutuk ho ksolok ba libertasaun iminente, iha mós konfuzaun no dúvida... Libertadór la'ós tenke sai husi Maromak nia Povu, maibé husi liurai estranjeiru ida? No bainhira libertasaun akontese, ba sé mak tenke atribui nia: ba Jahwéh, judeu sira nia Maromak, eh ba Marduk, Ciro nia maromak? Jahwéh la iha ona interese ba nia Povu? Eh lakon tiha ona nia kbiit?

Ida-ne'e problema teolójiku sériu ida, ne'ebé bele determina Povu mantein eh la mantein nia fiar ba Jahwéh. Deutero-Isaías buka esklareses kestaun ne'e no esplika Jahwéh nia papél iha akontesimentu sira.

MENSAJEN

Deutero-Isaías la iha dúvida: Jahwéh mak kondutór/gia loloos prosesu hotu ne'ebé nia tutun mak Maromak nia Povu nia libertasaun. Ciro, liurai boot ne'ebé hamonu Babilónia loko-an ne'e nia kbiit, mak “unjidu” (simu mina iha ulun, mesias iha ebraiku; iha gregu kristu) Jahwéh nian. Dehan katak Ciro mak “unjidu” signifika nia simu “unsaun” ho mina; no liuhusi “unsaun” ne'e, Ciro simu Maromak nia Espíritu ho mandatu ida misaun nian. Iha Testamentu Tuan, unsaun ho mina kapasita “unjidu” ba misaun liurai nian (kf. 2 Sam 5,3), ba misaun amlulik nian (kf. Ex 29,7), nune'e mós ba misaun profeta nian (kf. 1 Re 19,16; Is 61,1). Iha-ne'e, evidentemente, kona-ba misaun liurai nian... Nune'e, Maromak hili Ciro, hasuli Ninia Espíritu ba nia no fó ba nia emblema podér nian (vers. 5) atu nia, hala'o misaun liurai nian, sai instrumentu Maromak nian iha mundu.

Sá loos mak ho modu konkretu, Jahwéh husu ba Ciro? Sá loos misaun ne'ebé Nia konfia ba Ciro?

Maromak foti Ciro atu “domina nasaun sira”, “halo monu kro'at sira husi liurai sira nia knotak, “loke odamatan sira iha nia oin hodi la husik ida taka ba nia”. Espresaun sira ne'ebé Deutero-Isaías uza, situa misaun ne'ebé Maromak konfia ba Ciro iha ámbitu polítiku-militár... Buat ne'ebé predomina iha ne'e mak misaun tenke konkretiza ba Maromak nia Povu nia di'ak: se Maromak bolu Ciro “ho naran”, fó ba nia “títulu ida glória nian” no konfia ba nia kbiit ba nasaun sira, iha Jahwéh nia liafuan rasik, “tanba Jacob, ha'u-nia atan, no Israel, ha'u-nia eleitu...”. Bele haree momoos katak, Ciro mosu, nu'udar instrumentu atu liuhusi nia Maromak atua iha mundu no iha istória no realiza Ninia projetu salvasaun no libertasaun nian ba Ninia Povu. No liuhusi ema sira mak Maromak intervein iha mundu.

Deutero-Isaías hatudu momoos katak Jahwéh de'it mak Na'i istória nian no katak, li'ur husi Nia, la iha Maromak. Loos duni, Ciro la koñese Jahwéh; maibé, nia realiza Na'i nia projetu, maski nia la hatene Na'i.

Tan ne'e, ba Jahwéh no la'ós Marduk mak eziladu sira tenke agradese ba sira-nia libertasaun. Maski uza liurai estranjeiru ida, Jahwéh hatudu ba Judá katak, Nia mak, definitivamente, Maromak makso'ik no libertadór, ne'ebé Povu bele konfia.

LEITURA II – 1 Tes 1,1-5b

Tessalónica, iha sékulu I ita-nia era nian, mak sidade importante liu Macedónia nian. Importante portu marítimu no sidade ho komérsiu maka'as, nia sai fatin atu fiar oioin hasoru malu, iha-ne'ebé kultu lokál eziste hamutuk ho tipu hotu proposta relijioza sira seluk mai husi Mediterráneo tomak.

Paulo evanjeliza Tessalónica durante ninia viajen misionária daruak, provavelmente iha tinan 49-50. Paulo to'o iha Tessalónica akompaña husi Silvano no Timóteo, bainhira forsadu atu sai husi sidade Filipos nian. Tempu evanjelizasaun nian badak – fulan tolu nune'e; maibé suficiente atu hamoris comunidade sarani foun ho memmbro barak no entuziasta, ho maioria ema jentiu ne'ebé konverte an. Sei iha ne'ebá, Paulo nia obra para ho modu brutál husi kolónia judaika nia reasaun... Judeu sira akuza Paulo bá kontra imperadór nia dekretu sira no lori sarani balun iha juiz sira nia oin (kf. Apóst 17,5-9). Paulo tenke husik lalais sidade, iha kalan, hodi bá Bereia no, hafoin, bá Atenas (kf. Apóst 17,10-15).

Paulo iha konxiénsia katak formasaun doutrínal comunidade sarani Tessalónica nian seidak suficiente. Comunidade foun ne'e, ne'ebé foin harii no seidak simu katekeze natón, la iha forsa atu hasoru persegisaun no provasaun mai husi kontestu inimigu ba fiar (kf. 1 Tes 3,1-10). Tanba preokupasaun ne'e, Paulo haruka Timóteo bá Tessalónica, atu hatene notísia sira

no enkoraja sarani Tessalónica nian iha fiar (kf. 1 Tes 3,2-5). Bainhira Timóteo fila no apresenta ninia relatóriu, Paulo hela iha Corinto. Haksolok ho informasaun sira ne'ebé Timóteo fó, apóstolu deside hakerek ba sarani sira Tessalónica nian, fó parabéns ba sira-nia fidelidade ba Evanjellu. Nia aproveita mós atu esklarese dúvida doutrinál ruma ne'ebé halo sarani Tessalónica la hakmatek no atu korrije aspetu ruma ladún ezemplár iha vida comunidade nian.

Surat Dahuluk ba sarani sira iha Tessalónica mak, ho probabilidade tomak, hakerek dahuluk Testamentu Foun nian. Nia mosu iha Primavera-Bailoron tinan 50 eh 51.

Testu ne'ebé propoin mai ita apresenta surat nia enderesu (“Paulo, Silvano no Timóteo ba Kreda Tessalónica nian ne'ebé horik iha Maromak Aman no Na'i Jezús Kristu” – 1 Tes 1,1) parte ida husi orasaun naruk ida ne'ebé tau iha inísiu surat nian, iha ne'ebé Paulo agradese Maromak ba komportamentu ezemplár sarani sira Tessalónica nian; apézarde prova sira ne'ebé sira tenke suporta, sira fiél nafatin ba Evanjellu no ba Paulo nia hanorin (kf. 1 Tes 1,2-3,13).

MENSAJEN

Verbu prinsipál ita-nia testu nian mak verbu gregu “eukharistéô”(“fó agradese”); verbu sira seluk ne'ebé iha mak verbu sekundáriu. Nune'e, ita haree klaru kedas sá loos mak sentimentu sira no sá loos atitude fundamentál Paulo, Silvano no Timóteo nian, remetente surat nian: sira agradese no rekoñese profundamente Maromak. Tanba sá?

Tanba bele nota momoos Maromak nia asaun iha moris loroloron comunidade sarani Tessalónica nian. Iha proposta Evanejllu nia oin, Tessalónica nia oan sira hatán ho laran-luak, ho fiar ativa, ho karidade badinas no ho esperansa firme (kf. vers. 3). “Fiar ativa” halo atu adezaun ba Evanjellu la hatudu de'it ho liafuan sira, maibé ho atitude konkreta konversaun no transformasaun nian; “karidade badinas” fó konta kona-ba domin ida ne'ebé la'ós teóriu maibé efektivu, no tradús iha jestu sira entrega nian, partilla nian, doasaun nian; “esperansa firme” define Tessalónica oan sira nia konfiansa ne'ebé la nakdoko iha Maromak no iha moris foun ne'ebé Nia rai hela ba sira ne'ebé hadomi Nia – konfiansa ne'ebé, mundu nia rai-kunan no difikuldade sira moris nian la iha kbiit atu hamonu.

Buat sira-ne'e hotu mak rezultadun husi faktu katak Maromak mak “hili” Tessalónica oan sira (vers. 4). Iha Testamentu Tuan, “eleisaun” mak priviléjiu ida Israel nian, ne'ebé Maromak hili iha povu sira leet, la'ós tanba sira-nia méritu partikulár ruma, maibé nu'udar grasa no domin husi Maromak; oras-ne'e, comunidade sarani sira husi orijen jentiu nian mak sai objetu priviléjiu nian, no ninia hun mak Maromak makso'ik nia domin gratuitu.

Evanjellu ne'ebé Paulo, Silvano no Timóteo haklaken ba Tessalónica oan sira la'ós diskursu ida halo ho liafuan furak...; nia mak Liafoun Di'ak Maromak nian, kbiit-na'in no nakfilak moris, no nalian iha Tessalónica oan sira nia fuan ne'ebé, hodi Espíritu Santu nia kbiit, fó fuan fiar nian, domin nian no esperans anian (vers. 5a.b).

Tanba ne'e mak Paulo, Silvano no Timóteo hahí Na'i.

EVANJELLU – Mt 22,15-21

Ita iha Jerusalém, lokál ne'ebé sei akontese konfrontu finál entre Jezús no judaizmu. Husi sorin ida ita hetan dirijente judeu sira: metin ba sira-nia serteza no prekonseitu, sira rekuza atu simu Reinu. Husi sorin seluk ita iha Jezús: Nia buka atu dirijente Povu nian hola konxiénsia katak, hodi hakribi Reinu, sira hakribi oferta salvasaun Maromak halo ba sira.

Jezús hatudu situasaun ne'e ho aikanoik tolu (ne'ebé ita lee no medita iha domingu tolu liubá). Ida dahuluk, identifika sira ho oan ne'ebé dehan “sin” ba aman hafoin la bá serbisu iha

to'os (kf. Mt 21,28-32); daruak, tanesan sira ho serbisu-na'in aat to'os-ugas nian ne'ebé barani oho Na'in nia oan (kf. Mt 21,33-46); datuluk, kompara sira ho konvidadu sira ne'ebé rejéita konvite ba festa (kf. Mt 22,1-14). Dirijente sira tan hirus maka'as ho Jezús ne'ebé barani sadik sira ho komparasaun sira-ne'e, sira buka maka'as pretestu ida atu akuza Nia.

Iha kontestu ne'e mak Mateus apresenta kontrovérsia tolu entre Jezús no farizeu sira (kf. Mt 22,15-22.23-33.34-40). Objektivu mak toman nia ho afirmasaun kontroversa no hetan argumentu atu apresenta iha tribunál kontra Jezús.

Kestaun dahuluk ne'ebé farizeu sira, aliadu ho partidáru Erodes Antipas nian, tau ba Jezús mak kestaun delikada liu: kona-ba obrigasaun selu tributu/impostu ba imperadór Roma nian...

Aleinde impostu indiretu (estrada nian, alfándega, taxa oioin), provínsia sira Roma nian selu tributu ba Impériu, ne'ebé Roma mak determina nia kuantia no makhórik hotu Impériu nian tenke selu (menus labarik no katuas sira). Tributu mak sinál moe-boot sujeisaun nian ba Roma. Kestaun tau ba Jezús mak ne'e: justu eh lae atu tuir sistema ne'ebé hamosu moris-atan no injustisa?

Partidáriu Erodes no saduseu sira konkorda ho tributu, basá sira aseita sujeisaun ba Roma. Movimentu revolusionáriu sira konsidera imperadór ema ne'ebé hadau podér ne'ebé pertense mesak ba Jahwéh no bandu sira-nia membru pagamentu ba tributu. Farizeu sira maski la aseita tributu, sira iha pozisaun intermédia no la propoin solusaun violenta ba kestaun...

Pozisaun oioin, maibé ne'e kestaun ida atu tau "lasu" ba Jezús. Se Jezús konkorda ho pagamentu impostu nian, sira sei akuza nia kolaboradór no defensor Roma nian ne'ebé hadau podér ne'ebé pertense ba Jahwéh; maibé se Jezús ba kontra pagamentu, sira sei akuza nia nu'udar revolusionáriu, inimigu orden Roma nian...

Oinsá Jezús rezolve kestaun ne'e?

MENSAJEN

Konfronta ho kestaun ne'e, Jezús konvida ninia interlokutór sira atu hatudu osan impostu nian no rekoñese ilas grava iha osan (César nian). Hafoin, Jezús konklui: "imi fó ba César buat ne'ebé César nian, no ba Maromak buat ne'ebé Maromak nian" (vers. 21). Sá loos signifíkadu ba afirmasaun ne'e? Signifíka fahe ho modu hanesan obrigasaun entre podér polítiku no podér relijiozu?

Jezús hakarak hanorin ema atu labele indiferente ba obrigasaun sira ba komunidadé nia integra an bá. Nia tenke sai sidadaun ezemplár no kontribui ba di'ak komún. Ba buat ne'e, nia hanaran "fó ba César buat ne'ebé César nian".

Buat ne'ebé importante liu mak ema rekoñese Maromak nu'udar nia na'in ida mesak. Osan Roma nian iha ilas César nian: fó ba César. Ema fali, iha nia an la grava César nia ilas, maibé Maromak nia ilas (kf. Gn 1,26-27: "Maromak dehan: 'ita halo ema tuir ita-nia ilas, tuir ita-nia lalatak'... Maromak hakiak ema tuir nia ilas, iha nia ilas Maromak hakiak nia"): tan ne'e, ba Maromak de'it mak ema pertense, nia tenke entrega an ba Maromak no rekoñese Nia mesak de'it nu'udar nia na'i.

Jezús hakat liu kestaun ne'ebé sira tau ba Nia... Nia lakohi tama iha debate ho karákte polítiku no tau kestaun iha nivel kle'an liu no ezijente liután. Kestaun la'ós de'it diskusaun simples kona-ba pagamentu eh lae ba impostu, atu nakfilak ba apelu ida atu ema rekoñese Maromak nu'udar nia na'i no realiza ninia vokasaun esensiál entrega an nian ba Maromak (na'i no kriadór). Jezús la preokupa mós, atu afirma katak ema tenke fahe hanesan ninia obrigasaun sira entre podér polítiku no podér relijiozu; maibé, preokupa liuliu, atu halo klaru katak ema pertense de'it ba Maromak no tenke entrega ninia ezisténsia tomak iha Maromak nia liman. Buat seluseluk tenke relativiza, inkluzive submisaun ba podér polítiku.